

Lebih 1,000 beliawanis sertai Perhimpunan Bertadarus Al-Quran Belia Senegara

Berita dan Foto : Hernie Suliana Haji Othman

BANDAR SERI BEGAWAN, Khamis, 15 Jun. - Seramai 1,070 beliawanis dari agensi-agensi kerajaan, persatuan-persatuan belia, penuntut-penuntut, bekas peserta-peserta program belia dan orang perseorangan menyertai Majlis Perhimpunan Bertadarus Al-Quran Belia Senegara bagi Tahun 1438 Hijrah / 2017 Masihi.

Yang Teramat Mulia Paduka Seri Pengiran Anak Puteri Hajah Hafizah Sururul Bolkiah binti Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah berangkat ke majlis perhimpunan tersebut yang berlangsung di Masjid Omar 'Ali Saifuddien, di ibu negara.

Keberangkatan tiba Yang Teramat Mulia, dijunjung oleh isteri Menteri Kebudayaan, Belia dan Sukan, Datin Hajah Kalshom binti Haji Suhaili dan Setiausaha Tetap Kementerian, Kebudayaan, Belia dan Sukan (KKBS), Datin Paduka Dr. Hajah Norlila binti Dato Paduka Haji Abdul Jalil.

Majlis tersebut dimulakan dengan bacaan Surah Al-Fatihah

diketahui oleh johan qariah Musabaqah Tilawatil Quran Belia Kebangsaan 2017, Dayangku Amal Zahirah binti Pengiran Haji Jofri dan diikuti dengan Majlis Khatam Al-Quran yang dikepalai oleh penuntut Institut Tahfiz Al-Quran Sultan Haji Hassanal Bolkiah (ITQSHHB), Dayangku Nur Fatin Wahidah binti Pengiran Haji Md. Salihin.

Sementara itu, bacaan Tahtim dipimpin oleh Kumpulan Tahtim Universiti Islam Sultan Sharif Ali (UNISSA), manakala bacaan Doa Khatam dibacakan oleh penuntut ITQSHHB, Dayangku Zuhairah Amanina binti Pengiran Haji Zul Hasymi.

Majlis diserikan dengan Dikir Marhaban yang disembahkan oleh Kumpulan Dikir UNISSA dan berakhir dengan bacaan Doa Allah Peliharakan Sultan oleh Dayangku Amal Zahirah.

Majlis perhimpunan anjuran bersama Kementerian Hal Ehwal Dalam Negeri, Kementerian Pendidikan, Kementerian Hal Ehwal Ugama dan KKBS itu antara lain bertujuan untuk meningkatkan kesedaran para

belia dalam pembacaan dan penghayatan Al-Quran sebagai panduan hidup serta untuk mempertingkatkan dan mengukuhkan persefahaman dan kerjasama di antara agensi-agensi yang terlibat dalam pembangunan dan tarbiah belia.

Selain itu, ia juga bagi menyemarakkan bulan Ramadan dengan pengisian-pengisian yang bermanfaat terutama dengan pembacaan Al-Quran dan juga menggalakkan penglibatan belia dalam aktiviti keagamaan.

Dengan adanya majlis seumpama itu diharap akan dapat meningkatkan lagi penglibatan belia dalam aktiviti keagamaan yang sudah tentunya berupaya menjadi benteng buat generasi belia dalam menghadapi cabaran-cabaran yang mendatang.



YANG Teramat Mulia Paduka Seri Pengiran Anak Puteri Hajah Hafizah Sururul Bolkiah binti Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah berangkat menyertai Majlis Perhimpunan Bertadarus Al-Quran Belia Senegara bagi Tahun 1438 Hijrah / 2017 Masihi.



YTM Paduka Seri Pengiran Anak Puteri Hajah Hafizah Sururul Bolkiah menadah tangan ketika Doa Allah Peliharakan Sultan dibacakan.



SERAMAI 1,070 peserta wanita hadir pada Majlis Perhimpunan Bertadarus Al-Quran Belia Senegara bagi Tahun 1438H / 2017M.



MAJLIS diserikan dengan Dikir Marhaban yang disembahkan oleh Kumpulan Dikir UNISSA.